

通鑑紀事本末

DS  
747  
.2

S7553Y8  
1873  
v.1

747  
.2  
S7553Y8  
1873  
v.1

EAST ASIAN LIBRARY  
UNIVERSITY OF TORONTO LIBRARY  
130 St. George Street  
8th FLOOR  
TORONTO, CANADA M5S 1A5

University of Toronto  
Library  
e 403/62  
ASIAN COLLECTION















通鑑紀事  
本末  
三十二  
卷



同治癸酉仲夏  
江西書局開雕



通鑑紀事本末序  
國之有史史之有通鑑通鑑之  
有紀事本末三者不可一缺也  
國史因人通鑑因年本末因事  
人非紀傳不顯年非通鑑不序  
事非本末不明學者欲觀歷代



之史則必先觀通鑑既觀通鑑  
不能即知其端則必取紀事本  
末以類究之此宋袁機仲先生  
之書所以與司馬同功也先生  
喜誦資治通鑑苦其浩博爲之  
區別貫通號通鑑紀事本末參



知政事龔公茂良得其書奏上  
孝宗讀而嘉歎頒賜東宮及江  
上諸帥曰治道盡是矣他日召  
為大宗正簿遭際若此豈異文  
正之遇神宗哉通鑑上起戰國  
下終五代凡一千三百六十二



年為書二百九十四卷又為目錄三十卷考異三十卷紀載詳矣先生通理其間其事二百三十有九其書卷四十有二蠻夷僭竊廢興存亡無不備也約而該曲而當其亦以述兼作者乎



天下至大也千數百載至久遠  
也以書攷之大事繫中國者百  
餘爾嗟乎中國而有事可書非  
中國之幸也宦官亡漢則兼黨  
錮董卓兩晉之亂則兼賈后晉  
元八王五胡武氏之禍則兼韋



后藩鎮連兵則兼涇源梁州余  
初讀之疑其文繁事多立題太  
簡然欲為斷割分明勢有不可  
始知治亂之際誠難言之先正  
成書蓋不易也夫五胡變而為  
十六國十六國變而為北魏魏



變而為周齊齊變而為周其離  
合生剋即春秋之戰國漢季之  
三國未有若是之奇者也生民  
之厄至石虎而極衣冠之厄至  
爾朱榮而極此非中國乎夷居  
之夷治之即夷戮之矣晉有元



帝五代有石敬瑭宋有高宗皆  
中國之不忍言者也中原不復  
而祖逖死二聖未還而武穆誅  
天地之大痛也田疇借曹操以  
討烏桓龔壯說蜀李以事晉室  
人心之不絕也梁武帝之納侯



景謀吞魏也而命盡於臺城景  
延廣之拒契丹志尊晉也而寇  
叢於重貴亂離斯瘼賢哲乃興  
懷圖大之志者臨勢重而未能  
遇可為之日者當匪材而不任  
淪胥及溺又何道哉七國爭而



秦一之秦不能勝而歸於漢南  
北爭而隋一之隋不能勝而歸  
於唐三代以下觀天下者漢唐  
其表也然其興同其敗亦同唐  
之武韋即漢之呂后唐之藩鎮  
即漢之牧守唐之李輔國魚朝



恩即漢之曹節王甫唐之朱溫  
即漢之董卓二代相師不能相  
鑒何哉諸呂亂漢平勃定之以  
薄氏外家之賢迎立文帝戚患  
稍減矣至景帝尊竇氏武帝尊  
田蚡外戚復隆雖鉤弋即誅不



能殺也許史盛於宣元王趙盛  
於成帝哀帝繼之丁傅軼顯而  
莽遂代漢光武中興明帝紹統  
陰馬二后深抑外家可謂鑒於  
有夏鑒於有殷而章帝竇氏寵  
盛萌牙馴致竇憲驕奢梁冀弑



逆宦者因而成功漢祚竟斬唐  
太宗勇智天錫其得天下過於  
漢高一念不制巢刺王妃有慚  
德焉高宗惑武才人幾以覆唐  
中宗復辟尋蹈敗轍玄宗親戡  
韋氏之亂而楊妃蠱之安史盜



起身竄山谷肅宗即位靈武走  
馬不寧良娣為間父子崩離代  
德之際女謁無聞而宦官藩鎮  
共窺大器及昭宣而亡原二代  
之主鏡鑒前失不於其父則於  
其身非惟不能改也又從而甚



馬漢崇母后之黨政繇舅氏唐  
極宮幃之愛虐始懿親即其後  
陵遲芟夷激成者內豎衡行者  
強臣女主戚侯不任其咎抑君  
以此始君以此終矣東晉以後  
北魏最強而靈后之禍無殊呂



姁河陰之害不異鉤黨彼雖索  
虜成敗之理與中國等也曹操  
篡漢而司馬懿踵其智劉裕滅  
晉而蕭道成效其忍天之報施  
其不爽乎蕭繹之戮門內晉八  
王之相殘也朱溫之遭子禍安



祿山之後車也王莽切舌董卓  
然臍則亂賊可以懼心石顯徙  
殞盧杞道死則讒邪可以動魄  
世猶有鐘漏驚行途盡不反者  
是慕馮道之長樂而忘林甫之  
斲棺炫鄭眾之帶紱而遺張讓



之沈河也不亦悲哉紀事之書  
網維條目為世警戒於論治志  
貞觀君道莫浹焉於出師志諸  
葛臣節莫純焉於后妃志明德  
陰教莫脩焉觀晉武帝之立賈  
妃而知擇婦宜慎觀唐太宗之



廢承乾而知儲訓宜早觀楚王  
英之獄而知左道足以殺身觀  
董賢之嬖倖而知美男足以亂  
政觀宗愛之弑魏燾而知刑人  
不可近觀楊廣之殺楊勇而知  
婦言不可從觀匈奴之叛服而



知和親非策觀黃巾之聚散而  
知內治為本殷勤龜鑑其大者  
乎然而善善之長也與人之厚  
也雖有強藩可以教順魏博之  
田弘正成德之王承元也雖有  
寺人可以教忠東漢之呂強後



唐之張承業也雖有夷臣可以  
教義漢武之金日磾唐宗之契  
苾何力也雖有賊子可以教孝  
沈充之子勁李懷光之子瓘也  
讀者考究終始一事之義具見  
春秋其書於司馬通鑑寧特為



左傳之國語哉雖然余猶懼其  
有逸也事以年分其人之家世  
爵里或未載也年以人舉其國  
之大小險易或未悉也正史密  
之通鑑略之通鑑失之綱目得  
之是非善敗歧路錯綜余生也



晚不敢妄作竊依本書私用輔  
益標事綱於上方便觀覽也附  
末論於事訖辯臧否也稽之國  
史十七梗概略張證以朱子綱  
目書法不悖詩云他山之石可  
以攻玉余殆兢兢焉通鑑前編



尚恨簡脫宋元通鑑迄無善本  
余有志而愧不敏也無通鑑何  
以有紀事本末曷少俟諸

婁東張溥西銘撰



通鑑紀事本末序  
通鑑紀事本末有功於溫公通  
鑑者不可無也誠齋敘之於前  
節齋序之於後發明盡矣節齋  
患嚴陵本字小且訛於是精加  
讐校易為大字刊版而家藏之



凡四千五百面可謂天下之善  
本也頃年士學陋藝苑蕪此版  
束之高閣者四十餘年又懼其  
為勢家所奪也祕不示人一日  
節齋孫趙明安者過嘉禾謁學  
宮目擊余所為若不懈者乃歎



曰吾有所託矣庶幾不負吾祖  
之用心矣始出所藏書版示余  
曰昔有雲間好事者出中統鈔  
三百定求市吾不忍售恐流散  
而不能久其傳也若寘之嘉禾  
學宮償吾半值亦無憾矣余集



學之士議之或曰此書幸矣然  
挾貴勢而覬覦者得無為學校  
累乎或曰全是書以惠後學者  
厚德也挾貴勢而不償直者賢  
者不為夫何懼議未決適御史  
宋公一齋僉憲鄧公善之按臨



是邦良弼白其事二公大喜曰  
有補文治其速成之學宮方有  
助勑試闡之費力不能如趙所  
需乃出中統鈔七十五定價之  
趙亦不計也因書得版顛末於  
節齋敘次後之官於學者庶幾



知所寶焉時延祐六年歲在己  
未三月望日郡文學掾宣城陳  
良弼識



通鑑紀事本末序  
通鑑一書於治道最切實諸史  
之精華百代之龜鏡古未有也  
神宗皇帝深所愛重錫資治之  
嘉名且命經筵進讀歷朝寶之  
永以爲訓近世建安袁公復作



紀事本末區別條流各從其類  
豈求加於通鑑之外哉蓋通鑑  
以編年為宗本末以比事為體  
編年則雖一事而歲月遼隔比  
事則雖累載而照絡貫聯故讀  
通鑑者如登高山泛巨海未易



遽覩其津涯得本末而閱之則  
根幹枝葉繩繩相生不待反復  
它卷而瞭然在目矣故本末  
者通鑑之戶牖也袁公之為是  
書其殆司馬文正之疏附先後  
也歟與憲淳祐壬子退而里居



四年之間熟得繙閱每見世道  
開泰君明臣良百度脩舉四裔  
賓服使人忻悅愛慕至若叔世  
末造賢愚倒植綱頽紐解外阻  
內訌使人感情歎息要其指歸  
治未始不由於任君子亂未始



不由於親小人安未始不由於  
固民心危未始不由於困民力  
忠實事上者未有不昌姦諛欺  
君者未有不亡公廉宏濟者奕  
世流芳貪刻暴殄者子孫貽殃  
天道人事其應靡忒參稽源委



可以昭勸戒於方來是書之關  
於世教亦大矣嚴陵舊本字小  
且訛乃易為大書精加讐校以  
私錢重刊之非特便老眼訓子  
弟庶與四方朋友共之云寶祐  
丁巳秋七月朔古汴趙與篋謹



書



可以昭勸戒於後世

於世教亦大矣

且就為易為大書精加警校

和錢重刊之非特便老眼

弟庶與四方朋友共之云

書已秋七月朔古亦趙與憲謹



通鑑紀事本末序

初予與子袁子同為太學官子  
袁子錄也予博士也志同志行  
同行言同言也後一年子袁子  
分教嚴陵後一年予出守臨漳  
相見於嚴陵相勞苦相樂且相



楸以學子袁子因出書一編蓋  
通鑑之本末也予讀之大抵舉  
事之成以後於其萌提事之微  
以先於其明其情匿而泄其故  
悉而約其作窺而櫛其究遐而  
邇其於治亂存亡蓋病之源醫



之方也余每讀通鑑之書見事  
之肇於斯則惜其事之不竟於  
斯蓋事以年隔年以事析遭其  
初莫繹其終攬其終莫志其初  
如山之我如海之茫蓋編年繫  
日其體然也今讀子袁子此書



如生乎其時親見乎其事使人  
喜使人悲使人鼓舞未既而繼  
之以歎且泣也嗟乎由周秦以  
來曰諸侯曰大盜曰女主曰外  
戚曰宦官曰權臣曰夷狄曰藩  
鎮國之病亦不一矣而其源不



一哉蓋安史之亂則林甫之為  
也藩鎮之亂則令孜之為也其  
源不一哉得其病之源則得其  
醫之方矣此書是也有國者不  
可以無此書前有姦而不察後  
有邪而不悟學者不可以無此



書進有行而無徵退有蓄而無  
宗此書也其入通鑑之戶歟雖  
然覲人之病戚人之病理人之  
病得人之病至於身之病不懵  
焉不諱焉不醫之距焉不醫而  
繆其醫焉古亦稀矣彼闇而此



昭宜也切於人紓於身可哀也  
夫淳熙元年三月戊子廬陵楊  
萬里敘



夫斷頭示平三月長蘄刻縣  
萬里婦之病至於身之病不  
此人之病感人之病理人之  
不此言也亦入通鑑之戶  
宜也時茶入後茶良可來也



通鑑紀事本末目錄

卷一

三家分晉

卷二

秦并六國

卷三

豪桀亡秦

卷四

高帝滅楚

卷五



卷六 諸將之叛

卷六 帝薨焚

卷六 匈奴和親

卷七 梁亡秦

卷七 諸呂之變

卷八 共六國

卷八 南粵稱藩

卷九 秦公晉

卷九 七國之叛

卷十 本末目錄



梁孝王驕恣

卷十一

漢通西南夷

卷十二

淮南謀反

卷十三

漢通西域

卷十四

武帝伐匈奴

卷十五



武帝平兩越

卷十六

武帝擊朝鮮

卷十七

武帝惑神怪

卷十八

巫蠱之禍

卷十九

燕蓋謀逆

卷二十



霍光廢立

卷二十一

趙充國破羌

卷二十二

匈奴歸漢

卷二十三

恭顯用事

卷二十四

成帝淫荒

卷二十五



河決之患

卷二十六

丁傅用事

卷二十七

董賢嬖倖

卷二十八

王莽篡漢

卷二十九

光武中興

卷三十



光武平赤眉

卷三十一

光武平漁陽

卷三十二

光武平齊

卷三十三

光武平隴蜀

卷三十四

楚王英之獄

卷三十五



馬后抑外家

卷三十六

竇氏專恣

卷三十七

西域歸附

卷三十八

兩匈奴叛服

卷三十九

諸羌叛服

卷四十



鮮卑寇邊

卷四十一

嬖倖廢立

卷四十二

梁氏之變

卷四十三

上

宦官亡漢

黨錮之禍

董卓之亂附

卷四十四

黃巾之亂

卷四十五



韓馬之叛

卷四十六

袁紹討公孫瓚

卷四十七

曹操篡漢

卷四十八

孫氏據江東

卷四十九

劉備據蜀

卷五十



吳蜀通好

卷五十一

諸葛亮出師  
平南中附

卷五十二

吳侵淮南

卷五十三

魏平遼東

卷五十四

明帝奢靡

卷五十五



司馬懿誅曹爽

卷五十六

吳易太子

卷五十七

諸葛恪寇淮南

孫琳逆節附

卷五十八

魏滅蜀

卷五十九

淮南三叛

卷六十



司馬氏篡魏

卷六十一

晉滅吳

卷六十二

羌胡之叛

樹機能

齊萬年

卷六十三

陳敏之叛

卷六十四

上下

西晉之亂

賈氏

諸王

胡羯

卷六十五



劉淵據平陽

殺太弟又附

卷六十六

慕容據鄴

卷六十七

成李據蜀

卷六十八

張氏據涼

卷六十九

王敦平湘漢

卷七十



石勒寇河朔

卷七十一

前趙平秦隴

卷七十二

石勒滅前趙

卷七十三

氐據仇池

卷七十四

祖逖北伐

卷七十五



王敦之亂

卷七十六

蘇峻之亂

卷七十七

燕討段遼

討宇文附

卷七十八

趙魏亂中原

冉閔滅石氏附

卷七十九

江左經略中原

卷八十



桓溫伐燕

卷八十一

桓溫滅蜀

卷八十二

桓溫廢立

卷八十三

苻氏據長安

苻堅篡立附

卷八十四

苻秦滅涼

卷八十五



苻秦滅燕

卷八十六

慕容叛秦復燕

肥水之役姚萇滅秦慕容滅西燕附

卷八十七

丁零叛燕

卷八十八

拓跋興魏

卷八十九

魏伐後燕

慕容德據廣固附

卷九十



僞楚之亂

卷九十一

盧循之亂

卷九十二

譙縱之亂

卷九十三

呂光據姑臧

卷九十四

乞伏據金城

卷九十五



卷九十六  
禿髮據廣武

卷九十七

蒙遜據張掖

卷九十八

秦滅後涼

卷九十九

馮跋滅後燕

卷一百

蒙遜伐西涼

卷一百



乞伏滅南涼

卷一百一

蒙遜伐西秦

卷一百二

劉裕滅南燕

卷一百三

劉裕滅後秦

卷一百四

赫連據朔方

卷一百五



魏滅北燕

卷一百六

魏滅夏

卷一百七

魏滅北涼

卷一百八

魏平仇池

卷一百九

劉裕篡晉

卷一百十



元魏寇宋

卷一百十一

徐傅廢立

卷一百十二

彭城王專政

卷一百十三

宋文圖恢復

卷一百十四

宗愛弑逆

卷一百十五



太子劭弑逆

卷一百十六

南郡王之叛

卷一百十七

竟陵王之叛

卷一百十八

廢帝之亂

卷一百十九

宋明帝北伐

卷一百二十



蕭道成篡宋

卷一百二十一

魏遷洛陽

卷一百二十二

蕭鸞篡弒

卷一百二十三

元魏寇齊

卷一百二十四

蕭衍篡齊

卷一百二十五



南北交兵

卷一百二十六

魏伐柔然

卷一百二十七

肇忠用事

卷一百二十八

邢巒寇巴西

卷一百二十九

梁魏爭淮堰

卷一百三十



卷元又幽后

卷一百三十一

六鎮之叛

卷一百三十二

元顥入洛

卷一百三十三

元魏之亂

卷一百三十四

魏分東西

卷一百三十五



高氏篡東魏

北齊

卷一百三十六

宇文篡西魏

後周

卷一百三十七

侯景之亂

卷一百三十八

梁氏亂亡

陳霸先篡梁附

卷一百三十九

西魏取蜀

卷一百四十



蕭勃據嶺南

卷一百四十一

王琳犇齊

陳伐齊附

卷一百四十二

齊顯祖狂暴

常山王篡立附

卷一百四十三

安成王篡立

項

卷一百四十四

周陳之叛

卷一百四十五



宇文護逆節

卷一百四十六

周伐齊

周齊爭宜陽附

卷一百四十七

吐谷渾盛衰

卷一百四十八

周滅齊

卷一百四十九

楊堅篡周

卷一百五十



始興王謀逆

卷一百五十一

隋滅陳

卷一百五十二

隋易太子

卷一百五十三

突厥朝隋

卷一百五十四

隋討高麗

卷一百五十五



煬帝亡隋

卷一百五十六

高祖興唐

卷一百五十七

唐平東都

李密

王世充

卷一百五十八

唐平河朔

竇建德

卷一百五十九

唐平隴右

薛舉

卷一百六十



唐平河西 李軌

卷一百六十一

唐平河東 劉武周

卷一百六十二

唐平江陵 蕭銑

卷一百六十三

唐平江淮 杜伏威  
沈法興  
李子通  
輔公祐

卷一百六十四

唐平山東 劉黑闥

卷一百六十五



太宗平內難

卷一百六十六

太宗易太子

卷一百六十七

太宗平突厥

卷一百六十八

唐平鐵勒

卷一百六十九

唐平西突厥

卷一百七十



太宗討龜茲

卷一百七十一

太宗平高昌

卷一百七十二

太宗平吐谷渾

卷一百七十三

正觀君臣論治

卷一百七十四

唐平遼東

卷一百七十五



吐蕃請和

卷一百七十六

突厥叛唐

卷一百七十七

唐平奚契丹

卷一百七十八

武韋之禍

卷一百七十九

太平公主謀逆

卷一百八十



李林甫專政

卷一百八十一

姦臣聚斂

宇文融

楊慎矜

韋堅

卷一百八十二

楊氏之寵

卷一百八十三

安史之亂

卷一百八十四

劉展之叛

卷一百八十五



李輔國用事

張后

程元振附

卷一百八十六

僕固懷恩之叛

周智光附

卷一百八十七

元載專政

卷一百八十八

吐蕃入寇

代宗幸陝附

卷一百八十九

兩稅之弊

卷一百九十



裴延齡姦蠱

卷一百九十一

吐蕃叛盟

卷一百九十二

吐

涇源之變

李懷光之叛附

卷一百九十三

藩鎮連兵

卷一百九十四

僇文用事

憲宗平蜀

卷一百九十五

劉闢



憲宗平吳 李錡

卷一百九十六

魏博歸朝 田弘正

卷一百九十七

憲宗討成德 王承宗

卷一百九十八

憲宗平淮蔡 吳元濟 德宗討吳少誠附

卷一百九十九

憲宗討淄青 李師道

卷二百



河朔再叛

卷二百一

南詔歸附

卷二百二

宦官弑逆

甘露之變附

卷二百三

朋黨之禍

卷二百四

武宗平澤潞

劉植

卷二百五



裘甫寇浙東

卷二百六

龐勛之亂

卷二百七

回鶻叛服

卷二百八

吐蕃衰亂

唐復河湟附

卷二百九

蠻導南詔入寇

卷二百十



李克用歸唐

卷二百十一

黃巢之亂

卷二百十二

藩鎮之亂

卷二百十三

楊行密據淮南

卷二百十四

王建據蜀

卷二百十五



馬氏據湖南

卷二百二十六

晉王滅燕

卷二百二十七

後唐滅梁

卷二百二十八

莊宗滅蜀

卷二百二十九

鄴都之變

李紹琛之叛附

卷二百三十



安重誨專權

卷二百三十一

秦王之亂

潞王篡弑附

卷二百三十二

契丹入寇

卷二百三十三

孟知祥據蜀

卷二百三十四

石晉篡後唐

卷二百三十五



范楊之叛

范延光

楊光遠

卷二百三十六

契丹滅晉

劉智遠復汴京附

卷二百三十七

三叛連兵

卷二百三十八

郭威篡漢

劉旻據河東附

卷二百三十九

世宗征淮南

通鑑紀事本末目錄



通鑑紀事本末卷一

宋建安袁樞編輯

明太倉張溥論正

三家分晉

周威烈王二十三年 初命晉大夫魏斯趙籍韓虔  
爲諸侯

臣光曰臣聞天子之職莫大於禮禮莫大於分分  
莫大於名何謂禮紀綱是也何謂分君臣是也何  
謂名公侯卿大夫是也夫以四海之廣兆民之眾  
受制於一人雖有絕倫之力高世之智莫敢不奔



走而服役者豈非以禮爲之綱紀哉是故天子統三公三公率諸侯諸侯制卿大夫卿大夫治士庶人貴以臨賤賤以承貴上之使下猶心腹之運手足根本之制支葉下之事上猶手足之衛心腹支葉之庇根本然後能上下相保而國家治安故曰天子之職莫大於禮也文王序易以乾坤爲首孔子繫之曰天尊地卑乾坤定矣卑高以陳貴賤位矣言君臣之位猶天地之不可易也春秋抑諸侯尊周室王人雖微序於諸侯之上以是見聖人於君臣之際未嘗不惓惓也非有桀紂之暴湯武之



仁人歸之天命之君臣之分當守節伏死而已矣  
是故以微子而代紂則成湯配天矣以季札而君  
吳則太伯血食矣然二子寧亡國而不爲者誠以  
禮之大節不可亂也故曰禮莫大於分也夫禮辨  
貴賤序親疎裁羣物制庶事非名不著非器不形  
名以命之器以別之然後上下粲然有倫此禮之  
大經也名器旣亡則禮安得獨存哉昔仲叔于奚  
有功於衛辭邑而請繁纓孔子以爲不如多與之  
邑惟器與名不可以假人君之所司也政亡則國  
家從之衛君待孔子而爲政孔子欲先正名以爲



名不正則民無所措手足夫繁縷小物也而孔子惜之正名細務也而孔子先之誠以名器旣亂則上下無以相保故也夫事未有不生於微而成於著聖人之慮遠故能謹其微而治之眾人之識近故必待其著而後救之治其微則用力寡而功多救其著則竭力而不能及也易曰履霜堅冰至書曰一日二日萬幾謂此類也故曰分莫大於名也嗚呼幽厲失德周道日衰綱紀散壞下陵上替諸侯專征大夫擅政禮之大體什喪七八矣然文武之祀猶縣縣相屬者蓋以周之子孫尚能守其名



分故也何以言之昔晉文公有大功於王室請隧於襄王襄王不許曰王章也未有代德而有二王亦叔父之所惡也不然叔父有地而隧又何請焉文公於是乎懼而不敢違是故以周之地則不大於曹滕以周之民則不眾於邾莒然歷數百年宗主天下雖以晉楚齊秦之彊不敢加者何哉徒以名分尚存故也至於季氏之於魯田恆之於齊白公之於楚智伯之於晉其勢皆足以逐君而自爲然而卒不敢者豈其力不足而心不忍哉乃畏奸名犯分而天下共誅之也今晉大夫暴蔑其君剖



分晉國天子既不能討又寵秩之使列於諸侯是區區之名分復不能守而并棄之也先王之禮於斯盡矣或者以爲當是之時周室微弱三晉彊盛雖欲勿許其可得乎是大不然夫三晉雖彊苟不顧天下之誅而犯義侵禮則不請於天子而自立矣不請於天子而自立則爲悖逆之臣天下苟有桓文之君必奉禮義而征之今請於天子而天子許之是受天子之命而爲諸侯也誰得而討之故三晉之列於諸侯非三晉之壞禮乃天子自壞之也嗚呼君臣之禮既壞矣則天下以智力相雄長



遂使聖賢之後爲諸侯者社稷無不泯絕生民之類糜滅幾盡豈不哀哉

初智宣子將以瑤爲後智果曰不如宵也瑤之賢於人者五其不逮者一也美鬢長大則賢射御足力則賢伎藝畢給則賢巧文辯慧則賢彊毅果敢則賢如是而甚不仁夫以其五賢陵人而以不仁行之其誰能待之若果立瑤也智宗必滅弗聽智果別族於太史爲輔氏趙簡子之子長曰伯魯幼曰無恤將置後不知所立乃書訓戒之辭於二簡以授二子曰謹識之三年而問之伯魯不能舉其辭求其簡已失之矣



問無恤誦其辭甚習求其簡出諸袖中而奏之於是簡子以無恤爲賢立以爲後簡子使尹鐸爲晉陽請曰以爲繭絲乎抑爲保障乎簡子曰保障哉尹鐸損其戶數簡子謂無恤曰晉國有難而無以尹鐸爲少無以晉陽爲遠必以爲歸及智宣子卒智襄子爲政與韓康子魏桓子宴於藍臺智伯戲康子而侮段規智國聞之諫曰主不備難必至矣智伯曰難將由我我不爲難誰敢興之對曰不然夏書有之曰一人三失怨豈在明不見是圖夫君子能勤小物故無大患今主一宴而恥人之君相又弗備曰不敢興難無乃



不可乎螭蟻蜂蠆皆能害人况君相乎弗聽智伯請地於韓康子康子欲弗與段規曰智伯好利而愎不與將伐我不如與之彼狃於得地必請於佗人佗人不與必嚮之以兵然後我得免於患而待事之變矣康子曰善使使者致萬家之邑於智伯智伯悅又求地於魏桓子桓子欲弗與任章曰何故弗與桓子曰無故索地故弗與任章曰無故索地諸大夫必懼吾與之地智伯必驕彼驕而輕敵此懼而相親以相親之兵待輕敵之人智氏之命必不長矣周書曰將欲敗之必姑輔之將欲取之必姑與之主不如與之以



驕智伯然後可以擇交而圖智氏矣奈何獨以吾爲  
智氏質乎桓子曰善復與之萬家之邑一智伯又求  
蔡皐狼之地於趙襄子襄子弗與智伯怒帥韓魏之  
甲以攻趙氏襄子將出曰吾何走乎從者曰長子近  
且城厚完襄子曰民罷力以完之又斃死以守之其  
誰與我從者曰邯鄲之倉庫實襄子曰浚民之膏澤  
以實之又因而殺之其誰與我其晉陽乎先主之所  
屬也尹鐸之所寬也民必和矣乃走晉陽三家以國  
人圍而灌之城不浸者三版沈竈產鼃民無叛意智  
伯行水魏桓子御韓康子驂乘智伯曰吾乃今知水



可以亡人國也桓子肘康子康子履桓子之跗以汾水可以灌安邑絳水可以灌平陽也絺疵謂智伯曰韓魏必反矣智伯曰子何以知之絺疵曰以人事知之夫從韓魏之兵而攻趙趙亡難必及韓魏矣今約勝趙而三分其地城不沒者三版人馬相食城降有日而二子無喜志有憂色是非反而何明日智伯以絺疵之言告二子二子曰此夫讒臣欲爲趙氏游說使主疑於二家而懈於攻趙氏也不然夫二家豈不利朝夕分趙氏之田而欲爲危難不可成之事乎二子出絺疵入曰主何以臣之言告二子也智伯曰子



何以知之對曰臣見其視臣端而趨疾知臣得其情故也智伯不悛絺疵請使於齊趙襄子使張孟談潛出見二子曰臣聞晉亡則齒寒今智伯帥韓魏而攻趙趙亡則韓魏爲之次矣二子曰我心知其然也恐事未遂而謀泄則禍立至矣張孟談曰謀出二主之口入臣之耳何傷也二子乃陰與張孟談約爲之期日而遣之襄子夜使人殺守隄之吏而決水灌智伯軍智伯軍救水而亂韓魏翼而擊之襄子將卒犯其前大敗智伯之眾遂殺智伯盡滅智氏之族唯輔果在



臣光曰智伯之亡也才勝德也夫才與德異而世俗莫之能辨通謂之賢此其所以失人也夫聰察彊毅之謂才正直中和之謂德才者德之資也德者才之帥也雲夢之竹天下之勁也然而不矯揉不羽括則不能以入堅棠谿之金天下之利也然而不鎔範不砥礪則不能以擊彊是故才德全盡謂之聖人才德兼亡謂之愚人德勝才謂之君子才勝德謂之小人凡取人之術苟不得聖人君子而與之與其得小人不若得愚人何則君子挾才以爲善小人挾才以爲惡挾才以爲善者善無不



至矣挾才以爲惡者惡亦無不至矣愚者雖欲爲不善智不能周力不能勝譬之乳狗搏人人得而制之小人智足以遂其奸勇足以決其暴是虎而翼者也其爲害豈不多哉德者人之所嚴而才者人之所愛愛者易親嚴者易疎是以察者多蔽於才而遺於德自古昔以來國之亂臣家之敗子才有餘而德不足以至於顛覆者多矣豈特智伯哉故爲國爲家者苟能審於才德之分而知所先後又何失人之足患哉

三家分智氏之田趙襄子漆智伯之頭以爲飲器智



伯之臣豫讓欲爲之報讎乃詐爲刑人挾匕首入襄  
子宮中塗廁襄子如廁心動索之獲豫讓左右欲殺  
之襄子曰智伯死無後而此人欲爲報讎眞義士也  
吾謹避之耳乃舍之豫讓又漆身爲癩吞炭爲啞行  
乞於市其妻不識也行見其友其友識之爲之泣曰  
以子之才臣事趙孟必得近幸子乃爲所欲爲顧不  
易邪何乃自苦如此求以報讎不亦難乎豫讓曰不  
可旣已委質爲臣而又求殺之是二心也凡吾所爲  
者極難耳然所以爲此者將以愧天下後世之爲人  
臣懷二心者也襄子出豫讓伏於橋下襄子至橋馬



驚索之得豫讓遂殺之襄子爲伯魯之不立也有子五人不肯置後封伯魯之子於代曰代成君早卒立其子浣爲趙氏後襄子卒弟桓子逐浣而自立一年卒趙氏之人曰桓子立非襄主意乃共殺其子復迎浣而立之是爲獻子獻子生籍是爲烈侯魏斯者桓子之孫也是爲文侯韓康子生武子武子生虔是爲景侯韓借師於魏以伐趙文侯曰寡人與趙兄弟也不敢聞命趙借師於魏以伐韓文侯應之亦然二國皆怒而去已而知文侯以媾於己也皆朝於魏魏由是始大於三晉諸侯莫能與之爭



張溥曰荀瑤之伐鄭取九邑也在周元王之元年其後伐齊圍鄭滅夙繇襲衛強武最著而族盡於無恤者何也以賢陵人而以不仁行之智果所謂必滅之道也智宗之滅距三家爲侯其歲遠矣作者乃於威烈之二十三年備記其事志三家所繇大也智氏不滅晉有四卿之名而三家不顯智氏旣滅則魏駒傳斯趙無恤傳浣及籍韓虎傳啓章及虔而王命及之然則智氏存亡繫晉乎曰否瑤之不仁甚於三卿滅范中行氏逐出公道死立哀公而專其政皆瑤主之



使瑤不亡滅晉者瑤也或曰左氏傳終智伯通鑑始智伯通鑑所以接左氏豈無說乎曰一以示興亡之戒一以著周秦之端晉陽之守趙以仁興決水之禍智以驕滅此興亡之戒也晉分則秦強秦強則周亡此周秦之端也是故晉悼公合諸侯之眾敗秦於殽林君子美之三家受幽公之朝廢俱酒爲家人君子惡之尤而效焉則安王十六年齊田和爲諸侯矣顯王五年秦獻公有黼黻之服矣然未若韓趙魏氏之甚也田和之得爲諸侯也猶會魏楚衛於濁澤求之




於王也秦敗三晉之師受袞黼之錫王之失止  
於妄賞也韓趙魏氏則胡爲乎考之世家無請  
命之文列國無會求之牧三家爲侯直天子自  
命爾尤作史者所痛也或曰春秋之義好道而  
獎善苟有善焉小國之君蠻夷之長無不錄也  
魏文侯師事卜子夏田子方段干木趙烈侯相  
公仲連而親牛畜荀攸徐越二者亦當世之賢  
主也絕之不已甚乎曰否國家之善不易天下  
之惡一朝之令名不改累世之逆跡胡氏有言  
三晉欲分宗國舊矣委盟會於大夫而悼公親



政之志怠受貨賂於崔杼而平公黨惡之訓彰  
荀躒出會而魯昭弗歸三臣內叛而趙鞅復入  
陰凝百年周雖不命其誰與抗是則溫公特書  
之意明大夫滅君之始哀天子不恤同姓而賞  
亂臣之已過也

通鑑紀事本末卷一








政之志急受貨賂於臣好而平公黨惡之謂彭  
荀躒出魯而魯昭公歸三臣以叛所謂趙鞅復入  
陰凝百年國雖不命其誰與抗是趙鞅公特害  
之意明大夫諫君之始及天子不恤國往而謂  
亂臣之已過也







EAST ASIAN LIBRARY  
UNIVERSITY OF TORONTO LIBRARY  
130 St. George Street  
8th FLOOR  
TORONTO, CANADA M5S 1A5